

# HEBREONMAYA SHUAR AINA PAPI AARA AKUPTUKMAU

## Yuus nina uchiri akupkamu

**1** <sup>1</sup>Yuuska yaunchuk ina uuntri matsama jakua nunaka nukap auju jakuiti. Yuuska shuar wainchamaitiatcha nitanka igkuas auju jakuiti, nuna turachkusha mesekranmagsha auju jakuiti, ni shuar etegkramun akatar, ame shuar aina ujakarta tusa nunasha akuptu jakuiti. <sup>2</sup>Turasha yamai ii matsataj juika nina chichamen ujatmaktinaka nina uchirin akupturmakuitji. Yama nagkamchak nina apari Yuus turata tima, nugka aina junaka ashi najankauwaiti. Turamtai nina apari chicharuk: Ame najankaum juka ashi aminuiti, ame kuitamkum amek iistin atá tinaiti. <sup>3</sup>Cristoka nina apari ima senchirtina nuna nekamtikramaji. Tumau asa nigka Yuusjai meteketi. Tura nigka senchirtin asa, nina chichamenig ashi kuitamui. Cristo ina tunaarin utsantramkattsa mantamna nantaki, nayaimpinam pujus ashi ni najankamu aina nunaka iistasa, apari untsurini ekeemsauwaiti.

<sup>4</sup>Nigka Yuusa uchiri asa, niyaiti nayaimpinmaya shuar ainan nagkasauka. Nayaimpinmaya shuar

matsata nuka Yuusan takarin ainawai. Antsu Cristoka Yuusan uchiriyaiti. <sup>5</sup>Yuuska nayaimpinmaya shuar aina nuiyanka:

“Wii shuarnum akinati tima akina asam, ameka wina uchiruitme, tusagka tichauwaiti”.

Tura “nayaimpinmaya shuaran Apari atajai, tura ni wina uchir atii” tusasha tichauwaiti.

<sup>6</sup>Yuuska nina uchirin ju nugka jui akupeak:

“Nayaimpinmaya shuar aina nu ninak ashi emematiarti” tusa tinaiti.

<sup>7</sup>Nayaimpinmaya shuar ainan pachis Yuus chichaak:

“Nitaka wina takartin asar, naseya numamtuk senchi yujainawai, tura ji keawa numamtuksha najanainawai”,

tusa tinaiti.

<sup>8</sup>Turasha Yuus nina uchirin pachis chichaak:

“Yuusa, ame inamtairmekame tuke atinaiti. Tura shuar ainasha pegker inatnaitme.

<sup>9</sup>Ameka shuar pegker ainan takaina nu aneame, turakum pegkerchaun takau aina nuka

kajerame. Tuma asaakmin amina Yuusrum asan, wii aminka chikich ainan inagkasan etegkan shir anemtiksam-jame”.

<sup>10</sup>Nunasha uchirin pachis tawai:

“Apu, yama nagkamchakmesha nugka najankum, nayaimpisha amek najanamiamie.

<sup>11</sup>Nugkaka nayaimpijai atsutnaiti, turasha ameka tuke pujutnaitme. Nugkaka nayaimpijai jaanch mamuwa numamtuk jakartinaiti.

<sup>12</sup>Tura jaanch apijra yapajtaiya numamtuk yapajiatnaitme. Turasha ameka tuke pujutnaitme, tura amina pujutrumsha nagkankashtinaiti”, tusa tinaiti.

<sup>13</sup>Yuuska nayaimpinmaya shuar aina nunaka:

“Wina untsuruini ekeemsata, tumawakmin amina shuarum ainan ashi nepetkan, amini yaruakan ikankatjai” tusagka tichauwaiti. Antsu nina uchirin nunaka tinaiti.

<sup>14</sup>Ashi nayaimpinmaya shuar aina nuka iyashtinchau ainawai. Yuusa takarin ainawai, tura shuar uwemratin aina nu yaigta tusa ishimtai ainawai.

**Cristo chichame antukmauka tuke aneaku amainaitji timau**

**2** <sup>1</sup>Tuma asamtai Cristo chichame ii antukmauwa nuka, Cristo nemarar inaisaij tau asar, wake mesersa tuke aneaku amainaitji.

<sup>2</sup>Yuus nina chichamen, nayaimpinmaya shuar aina nuna akatar akupkauwa nuka tuke nekasa nuke ajakaruiti. Iman asamtai shuar nuna

chichaman umitsuk inaiyainak, tunaun takainanka Yuuska waittan sujakuuti. <sup>3</sup>Ina apuri Jesucristowa nu yama nagkamchaksha: Wii shuar ainanka uwemtikratjai tusa tinaiti. Tura ni chichakmaun antukaru aina incha ni tina nuka nekasaiti tusar ujatmakaruitji. Turutmawaru ainakrincha ii nu chicham umiachkurka, Yuus waittan suramsatna nuka uwemtumaitsuji. <sup>4</sup>Cristo chichamegka nekasaiti tusar incha shir nekamtikramataj tau asar, shuar Cristo chichamen etserainancha Yuus yaigkuuti. Turamu asar ii wainchatain iwainak taká jakaruiti. Wakan Pegkera nuka Yuus wakera turusag, ii turumaina nunaka suramsauwaitji.

**Jesucristo ashi apu aina nuna apuri atinaiti**

<sup>5</sup>Yamaram nugka atak atin pachisa chichainaj nuna, nayaimpinmaya shuar aina nu iisti tusanka Yuuska apumtikachuuti. <sup>6</sup>Yaunchuk David Yuusjai ni chichaamun aak: “Yuusa, ¿Ju shuarnum akinawa jusha ya asamtaiya ima emesha enentaimtame? ¿Ya asamtaiya jusha kuitamkattsamsha ima wakerame?” <sup>7-8</sup>Ishichik tsawan nayaimpinmaya shuar aina nu imanchau amajsauume. Turasha ataksha eme anentsa iitai amajsauume. Turam ame najankamu aina nuka ashi nigki inaitusume. David tu aaruiti. Tura Yuusan aujuk: “Ashi ame najankamu aina nuka ninak anturin atii”, tusa tina nuka eke waintsuji. <sup>9</sup>Turasha Jesús naka ishichik tsawan nayaimpinmaya shuar aina nu imanchau amajsauwaiti. Yuuska shir pegkeraiti tumau asa, ina shir senchi anenmak ashi

shuarnum Jesucristo waitas mantamnati tusa wakerukuiti. Nuna tura asa ni ima senchi eme anentsa iitai atii, tusa tinaiti.

<sup>10</sup>Ashi ni najankamu aina nuka ninuk ainawai. Nigka ashi wina uchir ainaka nayaimpinam puju-sarti tusa wakerawai. Nuna turataj tau asa Jesucristonka waittsati tusa Yuus tinaiti. Nuna turawa nui ni turatnurinka ashi umikuiti.

<sup>11</sup>Ii Yuusa uchiriya nui pegker-mantikamu ainatisha Yuusa uchiri ainaji. Nui Jesús Yuusa uchiriya nuka ii ainatin pachitmas, wina yatsur ainawai turamtanmagka natsamatsui. <sup>12</sup>David yaunchuk tu aaruiti. Jesús nina Aparin chicharuk: “Apaachi, amina pachisan wina yatsur ainan aujsatjai, amina emematkun nitajai iruuntsan kantamatjai”, titinan imatiksag aaruiti.

<sup>13</sup>Isafascha turusag Jesús titinaka aak: “Wika Yuusai enentaimjai. Wika jui Yuus nina uchiri ainan surusua nujai pujajai”, tusa tinaiti.

<sup>14</sup>Nuka nekasaiti: Uchi aina nuka chikichik shuarnumiag asar nu iyashik, tura nu numpak ainawai. Jesúscha shuarnum akina asa, nu iyashik numpasha inujai metek ajakuiti. Tumau asa iwanchi apurin nepetkatsa jakauwaiti. <sup>15</sup>Yaunchukka ashi shuarka iwanch inatai asar, jamuncha senchi ashama-jakaruiti. Turasha yamaika Jesús agkanmantikamu asar jamua nuka ashamsaji. <sup>16</sup>Nuka nekasaiti: Nigka nayaimpinmaya shuar ainan yaigtasa taachuiti. Antsu ii Abraham weantu ainatin ayamrutmak uwemtikramratsa taawaiti. <sup>17</sup>Tura nina yachi ainatin yainmaktaj tau asa, nigka shuartijai metek jasuiti.

Tuma inii waitas jakau asa, yamaika Yuusa emtin sacerdote apuri jasu asa, wait anentramas nita tunaurisha tsagkuurata tusa ina pachitmas Yuusan tuke aujurmaji. <sup>18</sup>Jesúska waitujaku asa, tura iwanch tunau takamtiksattsa nekapsamu asa, shuar ainan iwanch nekapkaisha tuke yaigtatui.

#### Jesúsaiti Moisésan nagkasauka

**3**<sup>1</sup>Wina yatsur, umaar ainata, Yuus atumin, untsurmaku asamtai, ninu ainarme. Tuma asarum Cristo Jesúska shir enentaimtustarma. Jesúska wina chichamur shuar aina ujakta tusa Yuus akupkamuiti. Tura niyiyaiti chikich sacerdote apuri aina nuna nagkasauka. Ni inii mantamna asamtai, nekasapita tuinaji. <sup>2</sup>Nigka ina yainmaktaj tau asa, Yuus turata timaunka metek umikuiti. Tura Moiséscha shuar ainan yaigtaj tau asa, Yuus turata timaunka metek umikuiti. <sup>3</sup>Turasha Moisés nagkasau, Jesús ima senchi eme anenmainaitji. Jea jeamkamu pegkeraitkai, nuna jeaamu eme anentaiya numamtuk Jesúska emematmainaitji. <sup>4</sup>Tura ashi jea aina nuka shuar jeamkamu ainawai. Antsu nugkanam iruna nunaka Yuus ashi najankauwaiti. <sup>5</sup>Moiséska Israel shuar ainan Yuusa jea numamtin ajaku aina nuna yayák, nina takatrinka metek umikuiti. Nigka Yuusa umirin asa, Yuusa chichamen juki, shuar ainan atak atina nuna ujakukuiti. <sup>6</sup>Antsu Cristoka Yuusa uchiriyaiti. Yamaika Cristowaiti ashi Yuusnau ainatin Apurigka. Ii Cristo namarainati Yuusa jea numamtin ainaji. Tura nigka inaitsuk nagkanmaunam

jeattsa wea asar, isha imanisrik kakarar shir aneasa Cristonmag enentaimsar pujumainaitji.

**Yuusa uchiri ainaka  
ayamsartin ainawai timau**

<sup>7</sup>Tuma asamtai Wakan Pegkera nu tawai tamau ajakuiti: “Yamai atum ainatiram Yuus tamau anta-yatrumka, <sup>8-9</sup>enentaimkachujai metekka airpa. Atumka yaunchuk atumin uuntri Yuusan umirkacharu aina tumauka airpa. Nitaka cuarenta uwítin aya nugkanmag matsa-majakarua nui, urutma nukap tunau takakrinig Yuuscha kajemainait tusa nekapsatts wakerujakaru ainawai. Tumaina asarmatai Yuus nitan pachis chichaak: Wii pegkernum yayámunka wainainayat, nitaka nekaprusartasa tuke wakerutainawai. <sup>10</sup>Tumaina asarmatai nitanka kajerkaruiajai. Turan nitan pachisan chichaakun: Nitaka nita wake-ramun enentaimainawai, tumaina asar wii taja nuna nekatnaka naki-tainawai. <sup>11</sup>Wika nitan kajerkan, chicham yapajimainchaun chichaa-kun: Nitaka wii nugka Canaánkan anajmatawaruitaj nuigka wayachartin ainawai tusan tinaitjai”, tusa Yuus tinaiti.

<sup>12</sup>Yatsur, umaar ainata, Yuus tuke pujuwa nu enentaimtut inaiyakrum, shuar tunaun enentaimtu jaku aina tumasrumek enentaimirum kuitam-mamatarma. <sup>13</sup>Tumakrum yamai timauwa nu tsawan eke au asamtai, kashi kashinig enentai ichichtu-nairtarma. Atum ainarum nuiya chichainak: Ika Yuus timauwa nu umiachkursha pegker matsamsat-taji tu enentaimainasha ainawai. Turasha nuka nekaschauwaiti. Nu

tumakrika Yuus tupanteakur tuma-mainaitji. <sup>14</sup>Ii Cristojai iruuntsa takainatika, yama nagkamchaku niini nekasppita tu jakmauka nunisrik jakrishia jamainaitji.

<sup>15</sup>Yuusa chichame tu aarmauwaiti: “Yamai atum ainatiram Yuusa chichame etsermau antakrumka, enentaimkachujai metekka airpa. Tura yaunchuk atumin uuntri Yuusan umirkacharu aina tumauka airpa” tawai.

<sup>16</sup>¿Ya Yuusa chichamen anturainayatcha umirkachu ainawa? Nuka shuar Egiptonam matsatun Moisés jiira agkanmamtikamua nu tumawaru-ruiti. <sup>17</sup>¿Yuuscha ya ainan kajer kaya cuarenta uwísha pujusuita? Nunaka shuar aina tunaun takaina asar aya nugkanmag jinaawarua nuna tura-waiti. <sup>18</sup>¿Ya ainan Yuus chicham ishichkisha yapajimainchaun chicharuk: Wii nugkan anajmatawaitaj nui wayawarka, wijaigka ayam-sashtin ainawai tinaita? Nunaka shuar chichaman umichu aina nuna tinaiti. <sup>19</sup>Yamaika shir nekaji: Nitaka Yuusa chichamen umikcharu asar, Yuus nitan yaunchuk nugkan anajmatawa nuigka wayacharuiti.

**Ayamratts wakerakrumka  
Yuusai wayaatarma timau**

**4** <sup>1</sup>Tuma asamtai ii ayamratnun Yuus anajmatramawaitaj nui wayataj tau asar, ii ainatika shir kuitammamain ainaji. <sup>2</sup>Ika Yuus uwentikramratts wakerutmawai tamau antukuitji. Turasha Moisés puju jakua nuisha Yuus Israel shuar ainan ashi uwentikatts wakerawai tamaun antukaruitiat, nita nekas-papi turamjia tusa umishtairinig uwemkacharu ainawai.

<sup>3</sup>Antsu ni nekasapita tinu asar, ii ainati nayaimpinam wayar nijaigka ayamratin ainaji. Nitán pachis Yuusa chichaak: “Wika nitán kakerkan, chicham yapajimainchaun chichaakun: Nitaka nugka Canaánnumka wijai ayamsartaska wayaachartinaiti timiajai”, tusa tinaiti.

Yuus nugkan ashi najana umik ayamrauwaiti. <sup>4</sup>Yaunchuk Yuusa chichamen tu aarmauwaiti:

“Yuus seis tsawan takas sieteya jui ayamrauwaiti”. <sup>5</sup>Chikich aarmaunmasha Yuus ataksha chichaak:

“Ju shuar ainaka wini wayawarka wijaiigka ayamrachartin ainawai”, tinaiti. <sup>6</sup>Yama nagkamchak Yuus uwemtikarturtaj tamaun antuku ainaka nita chichaman umischarag, uwemrucharuiti. Yamaikisha Yuuska uwemtikramrattsa wakera asa, ayamtan anajmakartawai. <sup>7</sup>Yamai tsawanta juisha Yuuska uwemtikramrattaj tawai. Yaunchuk David aak: “Yamai atum ainatiram Yuusa chichame etsermau antakrumka, enentaimkachua nunin airpa”, tusa tinaiti.

<sup>8</sup>Nu David aarua nunaka Josué shuar ainan nugka yamarmanam utsawa nuna pachis tatsui, antsu Yuuska yamai tsawanta juna pachis chichajakuiti. <sup>9</sup>Tuma asamtai ii Yuusnau ainatika, Yuus ashi ni takamaintrin ashimak siete tsawanta jui ayamrauwaiti atumsha nunisrumek ayamratnaitrume timauwa nu eke nakaku pujuinaji. <sup>10</sup>Ii Yuusjai ayamrattsa wainatika, Yuus ni takas ayamrauwa tumasrik, isha ayamratnaitji.

<sup>11</sup>Tuma asamtai yaunchuk ina uuntri nita chicham umishtairinig wayaacharu aina tumatsuk, nu

ayamtainam wayaattsarka kakanmammainaitji.

<sup>12</sup>Yuuska nina chichamea nujaig pujutan sukartawai, iman asa senchirtinaiti. Kuchii mai yantamen shir atsakamua numamtinaiti, kuchii iyashnum init waya tsupina numamtuk Yuusa chichamea nusha wakannumsha, tura ina enentaimtairin pegker auncha, pegkerchau auncha nekamtikramji. <sup>13</sup>Yuus najankamu aina nuuyagka nina umrumainka chikichkiksha atswai. Yuusa emtinka ashi nugkanam iruna nuka paan wantinui, nunin asamtai Yuuska ii takasmau ainan iis turamtinaitji.

#### Jesúsaiti sacerdote apurin nagkasauka

<sup>14</sup>Yuusa uchiri Jesús chikich sacerdote apuri aina nuna nagkasau ima senchirtin asa, nayaimpinam wayawaiti. Tuma asamtai Jesús nekasapita tinu asar, inaitsuk tuke nemarmainaitji. <sup>15</sup>Tumakrinka ina sacerdote Apuriya nuka nisha nekapeam waittsau asa, ii kakashkurincha wait anentrammainaitji. Imatika nekapeamsha nigka tunaunka takaschauwaiti. <sup>16</sup>Tuma asamtai Yuus anenma nuka araantutsuk aujsarmi. Ni inka wait anentramar ashi ii atsumainamunmasha yainmamainaitji.

**5** <sup>1</sup>Sacerdote apuri ainaka Yuus-jai chichau atii tsuar shuar ainanmaya etegkra anaikamu ainawai. Turamu asar nitaka shuar aina Yuusnau atii tusa akankamu ainan, tura tagku aina itainamun jukiar, Yuus pujamunam iwainakar maa epenak shuaran tunaui tsagkuurata tusar Yuusan aujujaku ainawai. <sup>2</sup>Sacerdote ainaka shuar

asar, tunaurtin ainawai. Tumau asar, Yuus umirtan nekachu aina tunaun takainancha wait anenmain ainawai. <sup>3</sup>Chikich shuaran tunauroi tsagkurnartintrin tagku ainan maa epena turusag nina tunauroi tsagkurnartinnasha tagku ainan maa epejarkaru ainawai. <sup>4</sup>Chikich shuarkesha: Wii sacerdote apuri atajai tusa tumammaitsui. Antsu Yuusaiti shuaran etegkar sacerdote apuri anak, Aarónkan iturkauwaita aitkasag, chichame anturtai amajas shuaran apujnuka.

<sup>5</sup>Cristosha nigki: Wii sacerdote apuri atajai tusangka tumamchawaiti, Yuusaiti nina etegka sacerdote apuri shuar ainan anturtai amajas apujsauka. Tura asa Yuus nina chicharuk:

“Wii shuarnum akinati tima akina asam, ameka wina uchiruitme”, tusa tinaiti.

<sup>6</sup>Chikich aarmaunmasha Yuus nina chicharuk: “Melquisedec sacerdote ajakua numamtuk, sacerdote tuke atinmeka ametme”, tusa tu aarmauwaiti.

<sup>7</sup>Cristo ju nugka jui mantamnatsuk pujus, útuk nea neajai Yuusan senchi aujsauwaiti. Nigka aparti senchirtin asamtai mantamnawai tusa uwemtikam amain asa tinaiti. Cristoka aparinka chichaman tuke anturu jakmau asa, Yuuscha uchiru untuamsha anturkayat waittsati tusa inaisauwaiti. <sup>8</sup>Turam Cristo Yuusa uchiriyaitiat, waitamunam aparti umirtanka unuimaruiti. <sup>9</sup>Nina aparti umirtainig pegker amajam asauwaiti. Turamu asa shuar nina nekasapita tuina nunaka pujut tuke atina nuna nigki ashi suawai. <sup>10</sup>Yuus Jesúsna sacerdote ainan

apuri atii tusa, Melquisedec ajakua numamtuk amajsauwaiti. Cristo nemarat inaisairum kuitammamatarma timau.

<sup>11</sup>Juna pachisan nu nukap tumainaitjai, turasha atumka wári unuimainchau asaakrumin, imatikan tumain nekapeatsjai. <sup>12</sup>Atumka Cristo nemarkurum nukap uwí pujau asarum, yamaika chikich ainasha jintinmainaitiatrum, itursag chikich aina Yuusa chichamen shir jintinramawaj tusarum atsumarme. Tuma asarum uchi kuirach yutain yumainchau asa, aya muntsunak muntsuwa numamtuk jainarme. <sup>13-14</sup>Atumka Yuus wakeramua nuka nekatsuk matsataina asarum, uchi muntsun muntsuakua numamtin ainarme. Antsu shuar uunjai metekka, juwapita Yuus wakera-muka, tura juwapita Yuus wakerachmauka tusa etegkar nekaina nu ainawai.

**6** <sup>1</sup>Yamaika shuar untan jintinmainaitaj turusnak jintintattajrume. Yamaika shuar Yuusa chichamen yama antaun jintinmaina turusnakka jintintashattajrume. Atumnaka tunau takatan inaiyainak, pujutin yapajawar Criston nekasapita tui-nak uwemrarti tusanka jintintashattajrume. Atumka ju pachisa jintiamuka nukapea antuku ainarme. Tuma asaakrumin yamaika Yuus wakeramu takamaina nuna pachisan jintintattajrume. <sup>2</sup>Entsanam maa-mua nu pachisa jintinkartamusha nekarme. Tura shuar Yuusan takatrin takasti tusa akupeaku muuk-num achina nusha nekarme. Tura Yuus ashi shuar jina ainan inantar, shuar chichaman umikcharu ainan, waittan susatna nusha nekarme.

<sup>3</sup>Tuma asaakrumin Yuus wakerakaigka, nekaawarti tau asan atumnasha, chicham yamarma nuna ujaktasan wakerajrume. <sup>4</sup>Shuar aina Criston nekasapita tuinayaitak inaisarusha ainawai. Nitasha Yuus shuar ainan pegkeran suamunka nekawaru ainawai. Nitasha Wakan Pegkera nu yayámuncha nekawaru ainawai. <sup>5</sup>Nitaka Yuusa chichame nuka nekas pegkerapita tusar shir nekainawai. Tura atakea nui Yuus nina senchirijai ju nugkanam inamratna nunasha shir nekawaru ainawai. <sup>6</sup>Tuma asamtai Yuusa chichame nekas pegkera nuna shir nekayat nuna inaiyakka, Criston wishikiak numinam achir maawa imanuk jawai. Tuma asa enentain yapajiagka atakka nemarmaitsui. <sup>7</sup>Shuarka aja numamtinaiti. Yumi yutakai ajanam árak arakmau shir tsapak nerekmatai juuk yu ainawai. Shuar Criston nekasapita tuina nunasha numamtuk Yuus pegker-num yayáwai. <sup>8</sup>Turasha ajanam nupa nupakmataigka takas ekeema ainawai. Numamtuk Yuuscha shuar aina nina nekasapita tutan inaisaru ainanka tsawan jeatna nui waittan susatnaiti.

**Yuus anajmakartuamua  
nuka nekasaiti**

<sup>9</sup>Yatsur, umaar ainata, shuar megkamainaiti taja nuka atum tumattarme tusanka tatsujrume. Wika shir nekajrume: Atumka Cristo uwemtikkamu aina matsammaina imanisrumek matsatainarme. <sup>10</sup>Yuuska nekas pegkeraiti. Iman asa atum Cristo anea asarum, Cristo namarin aina yaigkuitrum nunaka, tura yamaisha tuke yainarum

nunasha Yuuska kajinmatkishtinaiti. <sup>11</sup>Tuma asamtai atumka shir anearum takarum tumasrumek takastarma tusan wakerajai. Tuma pujautiram jaka nayaimpinam jeakrumin, Yuus anajmatramawa nuna ashi amasti tusan wakerajrume. <sup>12</sup>Tuma asan atumsha náichu atarma tusan wakerajrume. Tumakrum Criston nekasapita tinu aina tuke pegkernak takainaka Yuus anajmatramawa nunaka ashi jukiartin aina nuna pujuti iisrum metek takastarma tusan wakerajrume.

<sup>13</sup>Yuus Abrahaman anajmatawa nunaka, nina nagkasau chikich atsau asamtai, Yuus nigki anaimamas chichaak: <sup>14</sup>“Amina pegkernum yayákun, amee weantu ainan nukap napamtuktatjame tusan taja nunaka nekas turatnaitjai”, tusa tinaiti. Nuna Abrahaman anajmatuk Yuus tinu asa, chikich Yuus atsau asamtai, umiktajai tusa tinaiti. <sup>15</sup>Abraham Yuus anajmatruama nunaka imatiksagkeapi umiktatua tusa umamkes nakau asa, Yuus timaurinka imatiksag jukinaiti. <sup>16</sup>Shuar nitak sunaisattsá anagnainakka shuar chichame anturtai aina nuna pachisar, anagnain ainawai. Nu shuar antamunam tiaru asar metekeapi umiktatua tusar pachitsuk iku ainawai. <sup>17</sup>Numamtuk shuar ainsa nekasapipi umiktatua turutiarti tau asa, Yuuscha ni anajmakartamunka: Wii anajmatjarum nunaka atak awaigkinka yapajimaitsujai tusa tinaiti. <sup>18</sup>Jimar chicham yapajimainchaujai tina nuka, ni anagkartak nigki anaimamas tina nuwaiti. Yuuska waitrichu asamtai nekas nutikattawapi tau asar, ni anagkartuamua nu jukittajipi tuina asar,

Yuus ayamrutmasmatai nakainaji. <sup>19</sup>Tuma asar niimpapi uwentikrur-tatua, tusar shir nekainaji. Nuka nekasaiti. Jesúska nayaimpinam pujawai. <sup>20</sup>Tura nigka ina yainmak-tasa Yuus pujamunam nayaimpinam wayawaiti. Tuma asa sacerdote Melquisedec ajakua numamtuk sacer-dote apuri tuke atin jasuiti.

**Jesúska Melquisedec ajakua  
numamtuk sacerdote Apuriyaiti**

**7** <sup>1</sup>Melquisedecka, Salemnumia shuara apuri, tura Yuus ashi nagkakartakua nuna sacerdoteri ajakuiti. Iman asa Abraham ni shuar ainan irumar apu ainan patatuk nepetak, nuna warírin, tagkuri ainajai yarurak winittamaun Melquisedec nekaa, igkug pegkernum chicharkattsa jiintuknaiti. <sup>2</sup>Turam Abrahamsha maaniamunam nepet-mak shuara waríri ainan tagku ainajai cien yaruakmaun, diez akaantuk susauwaiti. Melquisedec ta nuka “apu nekas pegker taku tawai”. Yaakat Salemnumia shuar ainan apuri ajakuiti ta nuka “shir agkan enentaimsa pujutan sukartin taku tawai”. Nui Melquisedecka apu chichaman iwarin tama ajakuiti. <sup>3</sup>Tura nina aparincha, nukurincha, tura apachrincha pegkesha nekaracharu ainawai. Tura ni akinamurisha, tura jakamurincha pegkesha nekaracharu ainawai. Tumau asa Yuusa uchiri tuke pujuwa numamtuk sacerdote ajakuiti.

<sup>4</sup>Enentaimtusum iistarma: Melquisedecka Abrahaman nagkasau ajakuiti. Iman asamtai, Abrahamka maaniaku nepetmaka warí ainan tagku ainajai cien yaruakmaunka diez akaantuk susauwaiti. <sup>5</sup>Nu

turamuka chicham umiktinan Moisés aatsaig ajakuiti. Chicham umiktinan Moisés aak: Ashi sacerdote aina nuka Leví weantu artinaiti, tumau asar ashi nina patai ainanmayan warí cien aramunka diez seati tusa tinaiti. Ashi Israel shuar aina nuka Abraham weantu asar, Leví weantu ajakaruiti. <sup>6</sup>Turasha Melquisedecka Leví weantu ajakchauwaiti, tumauwaitiat Abrahaman warí cien jukimun diez seawaiti. Turam Yuus Abrahaman chicharuk: Wika aminka pegkernum nukap yaigtin asan, ame weantu ainan nukap napamtuktatjame tusa anajmatawa nunaka Melquisedec pegkernum chicharkauwaiti. <sup>7</sup>Tuma asamtai shuar chikichan pegkernum chichara nuka ni pegkernum chicharmaun nagkasauwaiti tusar nekamainaitji. <sup>8</sup>Yamai ii ainatika, sacerdote ijai metek jinin aina nu ina waríri cien arutamuka diez akanka suinaji. Turasha Yuusa chichame tu aarmauwaiti: Melquisedecka yamaikisha pujawai. <sup>9-10</sup>Leví akiintsaisg tura ni weantu ainasha akinainatsaig, nita sumaina nuna Abraham nina waríri cien aramun diez akantuk Melquisedecka susauwaiti. Nu turawa nui nitasha Abrahamjai pujusarua numamtin ainawai.

<sup>11</sup>Leví weantu sacerdote aina nuna, shuar ainan chicham umitnum yaigti, tusa Israel shuar ainan chicham umiktinan Moisés susauwaiti. Tura nu sacerdote ainaka Yuusa emtin shuar ainanka pegkera imannaka iwainamainchau ajakaruiti. Tuma asamtai chikich sacerdote Melquisedec ajakua imanun Aarón weantuchun atsumajakaruiti.



<sup>12</sup>Yamaika Leví weantuchu chikich sacerdote awai. Tuma asamtai chicham umiktinan Moisés aarua nusha yapajinmainaiti. <sup>13-14</sup>Ii yamai sacerdote taji nuka, ina apuri Jesucristo Judá weantu ajakuiti, nigka Leví weantuka ajakchauwaiti, tusar shir nekaji. Tura Moisés sacerdote ainan pachis chichaaksha, Judá weantu ainanka pachikchauwaiti.

<sup>15</sup>Tuma asamtai Jesúska chikich sacerdote aina nujaigka metekchauwaiti, nigka sacerdote yarmarmaiti, Melquisedec ajakua numamtinaiti. <sup>16</sup>Nigka Moisés sacerdote ainaka Leví weantu arti tusa tina nuchauwaiti. Antsu nigka sacerdote senchirtin tuke pjuwuwa nuwaiti. <sup>17</sup>Nina pachis yaunchuk Yuus chichaak:

“Melquisedec sacerdote ajakua numamtuk, sacerdote tuke atinmeka ametme”, tusa tinaiti.

<sup>18</sup>Chicham umiktinan Moisés aarua nuka uwentikartumainchau asa yamaika nagkankayi. <sup>19</sup>Chicham umiktinan Moisés aarua nujaigka chikichik shuarkesha pegkermantikam asachuiti. Turasha yamaika Jesucristo nekasapita tuinakur Yuusjai iruunmainaitji.

#### **Cristo Sacerdote nekas pegkerka atinaiti**

<sup>20</sup>Yuus chikich sacerdoten etegkeaksha imatiksagka chicharu jakchauwaiti, tumauwaitiat Jesúsán pachis chicham atakka yapajiashtinan chichaak: “Wina uchir Sacerdote tuke pjuu atinaiti”, tusa tinaiti.

<sup>21</sup>Yuusa chichame tu aarmauwaiti. “Apu Yuus chichaak: Wina chichamrunka yapajiashtatjai. Ametme Sacerdote tuke atinmeka”, tusa tinaiti.

<sup>22</sup>Yuus nuna tusa tinu asamtai, yamarman anajmatramawa nuna Jesús nekas umiktatuapi, tusar shir nekaji. <sup>23</sup>Sacerdote aina ashi jinu jakaru asar nukap ajakaru ainawai. <sup>24</sup>Turasha Jesúska nuka jachau tuke pjuuwaiti. Iman asa nina takatrinka chikichnaka ikurkishtinaiti. <sup>25</sup>Antsu nigka inii mantamna asamtai, ii Yuusai surumankurinka yaigkarta tusa Yuusan aujturmajai.

<sup>26</sup>Sacerdote apuri ii atsumamuka Jesúsaiti. Nigka nekas pegkeraiti, tunauncha antiakchau, tunaurinchau asa, shuar tunau ainajai iruunar pujaksha, nitajai metekchau ajakuiti. Iman asamtai Yuus chikich ainan nagkasau amajas apuj-sauwaiti. <sup>27</sup>Nigka chikich sacerdote aina tumauchauwaiti. Nitaka kashi kashinig tagku ainan maa epenak, yama nagkamchakka nita tunaaurina tsagkurturta tusa Yuusan aujsar, nui chikich shuar ainan tunaaurisha tsagkuurata tusar Yuusan auju jakaruiti. Antsu Jesúska: Atakka pegke jakashtinan shuar ainan tunaaurin Yuus tsagkurati tusa nigki tsagkamanak chikichkia mantamnawaiti. <sup>28</sup>Chicham umiktinan Moisés aarua turusag sacerdote etegkramu ainanka nekas pegkerka ajakcharuiti. Turasha Yuus nina uchirin chichaman atakka yapajiashtinan chicharuk, ame Sacerdote apuri atá tusa tinaiti, tura nigka nekas tuke pegkerak atinaiti.

#### **Ina sacerdote Apurigka Cristo nayaimpinam pujawai**

**8** <sup>1</sup>Wii pegkeran titasan wakerajrum nuka juwaiti: Ina sacerdoteri apuri ainan ashi nagkasauwa nuka Jesús, nayaimpinam Apari

untsurini eketa nuwaiti. <sup>2</sup>Turasha nigka shuar jea jeamkamunmagka wayagka takatsui, antsu nigka jea Yuus najanamunam wayaa Yuusnaka emematui.

<sup>3</sup>Sacerdote apuri ajakarua nuka: Ame shuar aina Yuus susattsar anajmatamu ikaanainamu jukim ejétakum, tagku maam epeakum, shuar aina tunauro pachisam Yuus aujsata, tusa anakamu ajakaruiti. Turasha Jesucristoka ina tunauro mantamnak nina iyashinak Yuusnaka susauwaiti. <sup>4</sup>Nisha ju nugka juig pujakka, juiya sacerdote ainaka Moisés chichakmaunak umiras takaina asarmatai, sacerdoteka amaitsui. <sup>5</sup>Juiya sacerdote aina nuka Yuus nayaimpinam jea jeamkamunam Jesús wayaa Yuusan ememata numamtuk jeamkamunam wayaawar takainawai. Yuus Moisésan chicharuk: “Wina ememaitritin nayaimpinmaya jea numamtuk jeamkata, tusan nainnum wii ujakmijam, turusmek jeamkata”, tusa tinaiti. <sup>6</sup>Tuma asa Jesús taká nuka juiya sacerdote aina takaina nuna nagkasauwaiti. Ni ina Yuusjai igkumtikramkataj tau asa, nigki tsagkamanak mantamnawaiti. Tura ni yamarman anajmatramawa nuka chikich aina nuna nagkasau shir pegkeraiti.

<sup>7</sup>Moisés Yuusjai igkuniak chicham umiktinan aarua nuna shuar aina uminak uwemrarti tusa susamu akaigka, atak awenagka chicham umiktinnaka sumain amajkachuiti.

<sup>8</sup>Turasha Yuus iismaka, shuar aina nuka shir pegkerka ajakcharuiti, tumau asar chichaman umikcharu ainawai tusa tinaiti. Yuus chichaak: “Chicham umiktinan Moisés aarua nunaka wii yapajiakun, chikich yamaram chichaman Israel shuar

ainan, Judá weantu ainancha yapajiatin tsawan jeatnaiti. <sup>9</sup>Chicham yamarma nu yaunchuk chichamjai metekchau atinaiti. Atumi uuntri aina Egiptonam matsamsamtaí, sENCHI yaigkan jiuuruitjai. Turasha wina chichamrun umikcharu asarmatai pachitsuk inaisamijai”, tusa Yuus tinaiti.

<sup>10</sup>Atak atina nui Israel shuar ainan chicham yamarman wii taja nuka juwaiti: “Wii atumin chicham umiktarma tinaitjarum nuna shir nekamtikatnaitjarme. Tura wina chichamrunka ishichkisha kajinmatkishtinan atumi enentain shir anemtiktnaitjarme. Atumka winau asaakrumin, atumi Yuusri asan wisha atumnaka shir kuitamatnaitjarme.


<sup>11</sup>Turamu asarum, uchi ainajaimak ashi uun ainatirmesha Yuuska shir nekatín asarum, ni shir nekattsarmeka atumin pataijaigkisha, tura amikrumjaigkisha ininiaschatin ainarme. <sup>12</sup>Shuara tunauro ainanka tsagkuuran, atakea nuisha ishichkisha enentaimtuschatnun kajinmatkin inaisatnaitjai”, tusa tinaiti.

<sup>13</sup>Nuna tusa Yuus yamaram chichamjai yapajiawaiti. Turamu asamtaí yama nagkamchak chicham umiktinan Moisés aarua nu umiktarma tamaka shuar ainaka achar tinaiti. Tumatin asamtaí nu chichamka ujumak asa megkaakatnaiti.


#### Yuus ju chicham umiktarma timaun Moisés aaruiti

**9** <sup>1</sup>Yuus Israel shuar ainan winaku tu emematrumain ainarme tusa ujakuiti. Tura ni ememattasa iruuntai jea jeamtinnasha, nugkanam tu jeamkatarma tusa shir ujakuiti. <sup>2-4</sup>Turamu asar nuapjai jea uuntan

Jisukristu pujai Judío iruuntai jea ajaku



Iruuntai jea



1. Pan patatai mesa ajakuiti
2. Jii ekemara ekentai ajakuiti
3. Kugkuin incienso aestai ajakuiti
4. Janch wankarmajai tesamu ajakuiti
5. Chicham umiktin kayanam aarmau egkeamu ajakuiti
6. Jimar querubín Yuus pujamun iwainau ajakuiti

*(He 9.2-4)*

jeamkar, jimapetuk tesawar jaanch wagkarmajai ajaawaruuti. Yama nagkamchak tesamunka Pegker tu jaku ainawai. Nu tesamunam ji ekeemara ekentai, tura sacerdote yuatin pan patatai ajakuiti. Nui kugkuin incienso epetai tabla najanamu aya orok epekmau ajakuiti. Chikich tesamu ukunam ajakua nuna Shir Pegker tujaku ainawai. Nui arca tabla najanamu nusha aya orok epekmau ajakuiti. Nuna arcan initken ichigkan oro najanamunam maná chumpiamu ajakuiti, tura Aarónkan ushukrutairi, tura chicham umiktin kayanam aarmaun Moisés nainnumian itaawa nu chumpiamu ajakuiti.

<sup>5</sup>Antsu arcan tuntupen jimar querubín Yuus pujamun iwainau arcan mai igkumtiksar wajau nakumkamu ajakuiti. Turasha yamaika nuna pachisnaka imatikan tichattajai.

<sup>6</sup>Nu umikmau ajakua nuigka sacerdote aina nita takatrin takasartasa tesamu Pegker tutainam kashi kashinig tuke waya jakaru ainawai. <sup>7</sup>Turasha nuna ukurin tesamu Shir Pegker tutainmagka



(He 9.7)

ima sacerdote apurig chikichik uwítin tagku numpen takus chikichkia wayak, ni tunau takasmaurin, tura chikich shuar aina tunau takasmaurin pachis tsagkurturta tusa aujujakuaruuti. <sup>8</sup>Ju ashi enentaimtusa nekaji: Wakan Pegker ina jintintra-muk, yama nagkamchak tesamunam sacerdote takainagsha, chikich ukunam tesamu Shir Pegker tutai ajakua nuigka ima sacerdote apurig waya jakuiti. <sup>9</sup>Ashi nita takasarua nunaka ii takastinan iwainturmak tuma jakaruuti. Yaunchukka tagku ainan Yuusnau atii tusa akankamun itainakai, sacerdote jukiar maa epejakuaruuti. Nuna tu emematainaksha nita tunaureka tuke tsagkurnak tsagkurna jakcharuiti. <sup>10</sup>Chicham umiktarma timaun uminak: Nu yuatarma, nu umartarma tura pegker jastasrum ikijmakrum nijamartarma tusa timauncha umiru jakaruuti. Nu chicham umiamua nuka enentaimmaun pachis tatsui, ayatik iyashi pachis tawai. Turasha Yuus nunaka yapajiawaiti.

#### Jesucristo chicham yamaram umiktinan nekantikramawaitji

<sup>11</sup>Cristo ju nugka jui taa waketkina nuwaiti yamaika nekas sacerdote apuri ainan nagkasauka niyiyaiti. Iman asa Yuus anajmakartuawa nuna ashi iinka niyiyaiti. Nigka ju nugka jui jea shuar jeamkamu aina nuigka takatsui, antsu nigka nayaimpinam Yuus umikmaunam nekas pegkernum wayaa pujuwaiti. <sup>12</sup>Tura nayaimpinam Yuus shir pegkernum puja nui Cristoka wayawaiti. Turasha nigka chivo ainan, vaca tsakat ainan numpen juki shuar ainan tunauren Yuus tsagkurati tusa jukigka wayachuiti. Antsu nigka ina tunauren

Yuus tsagkurtamratnun atakea nuigka mantamnashntinan mantamnak numpen puaruiti. Ni nunikmaunam inka tuke atinan tsagkurtamrauwaitji.  
<sup>13</sup>Chicham umiktinan Moisés aarua nuigka, shuar jakaun achikaru ainanka tura ja ainancha wapikrurua numamtin enentaimtu jakaruiti. Tumau asar nitaka chikich ainajai iruuntrarka Yuusnaka emematmainchau ajakaruiti. Nitau iyashin pegkermakar chikich ainajai iruuntrar Yuusan emematiartaska sacerdote aina vaca ainan, tura cabra ainan maawar nuna numpen jukiar, vaca tsakat epeamu yuku jasmatai, nuna yukurin juki entsajai pachimrar, shuar ainan ukatkar, iyashka yamaika iwarkaji tu jaku ainawai.  
<sup>14</sup>Cristoka tunaunka pegkeshasha takaschauwaiti. Tumau asa shuar aina mantuawarti tusa Wakan Pegkera nu yayasam tsagkamankauwaiti. Tuma numinam achinar mantamnak numpen puaruiti. Ika tunau asar Yuus tupantrar pujamun agkanmamtikramattsa mantamnawaiti. Nina numpen puarua nunaka ina iyashin pegker amajsattsa tumachuiti. Antsu nunaka Yuus tuke pujuwa nujai iruuntrar, ni wakeramun takarsarti tusa tumawaiti.  
<sup>15</sup>Tuma asamtai shuar tunaui tsagkuuramu ainanka pujut tuke atin nayaimpinam a nuna Yuus anajmatawaiti. Jesucristo pujut nagkanchaun sukarta nuka, ina agkanmamtikramattsa mantamnawaiti. Tuma asa nigki chicham yamarman nekamtikramawaitji.

**Numpajai ashi  
 pegkermantikamu  
 amain ainawai timau**

<sup>16</sup>Shuar aina: Wii jakaisha ame wina warír jukita tusar papiinum

shir aar iku ainawai. Turasha eke iwáku pujaigkika ame jukita timausha jakamtai jukimij tusar nakau ainawai. <sup>17</sup>Shuar iwáku pujakaigka ishichkisha jutsuk pujau, antsu nu shuar jakamtai, ame jukita timaunka ashi yarumin ainawai.  
<sup>18</sup>Moisés tagkun numpen taká jakua nunaka shuar aina Yuusa chichamen umirkatjai tuinakai turu jakuiti.  
<sup>19</sup>Yuus yama nagkamchakka Moisésan nina chichamenka ujakuiti. Turam Moisés shuar ainan ujakuiti. Tura ashi ujak, nui tagku ainan maa, numpen juki yumijai pachimar, oveja ure kapantun juki, númi hisopo tutai kanawen shir jigkaa numpanam ajug, chicham umiktin aarmaun ukatuk, shuar ainancha numpajai ashi ukatkauwaiti. <sup>20</sup>Nuna ashi tura umik shuar ainan chicharuk: “Ju numpa juka Yuus atumin umiktarma tusa turamna nuna shir nekamtikramui” tusa tinaiti. <sup>21</sup>Moiséska Yuus ememattasa iruuntai jeancha, tura nu jeanam sacerdote takatairi irununka numpajai ashi ukatkauwaiti. <sup>22</sup>Chicham umiktinan Moisés aarua nui: Numpajai ukatkamau aina nuka Yuusnau atii tusa turamu ainawai tinaiti. Numpajainchuka tunauka tsagkurnarchatnaiti timau ajakuiti

**Jesucristoka nina nakaina  
 nuna uwemtikrattsa  
 winittawai timau**

<sup>23</sup>Yuus ememattasa iruuntai jeanam takatai iruunu ajakua nuka nayaimpinam iruna numamtuk ajakaruiti. Nu warí aina nuka tagku numpejai iwaramu amain ajakuru ainawai. Antsu ii nayaimpinam pujustin ainatika kuntinan numpejai

pegkermamtikachmau ainaji. <sup>24</sup>Cristoka shuar jea shir Pegker tamaun umikarua nuigka wayachuiti. Antsu nigka shuar takaschamunam Yuusa nu takasmaunam nayaimpinam wayaawaiti. Tuma asa yamaika ina pachitmas Yuusan aujuk pujawai. <sup>25</sup>Ashi uwítin sacerdote apuri aina jea tesamu shir Pegker tutainam tagku numpen jukiari chikichkia waijakaru ainawai. Turasha Cristoka ina tunaaurin tsagkurtamratsa chikichkia mantamna nantaki nayaimpinam Yuus pujamunam wayaawaiti. <sup>26</sup>Nu tumashtaika nisha nugka yama nagkamchaku najanamua nui nagkamna, yamaiya juisha tuke mantamna pujumainaiti, turasha nuna tumatsuk chikichkia taa, shuar ainan tunaaurin utsagtasa mantuawarti tusa nigki tsagkaman-kauwaiti. <sup>27</sup>Ashi shuar ainatika chikichkia jakartin ainaji. Tumawakrin Yuus ii takasmaun iis turamtinaitji. <sup>28</sup>Cristosha ashi shuarti tunaauri ainan utsantramkattsa chikichkia mantamnawaiti. Tura yamaika awenagka mantamnashtinaiti, antsu atak winakka nina nakaina nuna uwemtikrattsa winittawai.

**Cristo ina tunaaurinka  
tsagkurtamrauwaitji**

**10** <sup>1</sup>Chicham umiktinan Moisés aarua nunaka atak nayaimpinam atinan iwainak turawaiti. Tuma asamtai chicham umiktina nuna uminak chiki chikichik uwítin tagku ainan maa epenak ajam-naiya jakaruiti. Turasha nujaigka nita tunaaurigka tsagkurnarcharuiti. <sup>2</sup>Tagku Yuus suamua nuna numpenig tunauncha tsagkurnarar tunaurtinchau wemainaitkaigka,

tagkun chikichnaka maamainchau jakaru ainawai. Antsu nitaka shir tsagkurnarchajapi, junisnak nagkan-kunka waittan jumainapitja tuina asar, ataksha tagkun chikichan maa jakaru ainawai. <sup>3</sup>Turasha nu tagku ainan maa epejarkarua nuka nita tunau takatai ainan anemtiku jakuiti. <sup>4</sup>Tuma asamtai vaca uchiri, cabra uchiri numpe aina nuka ina tunaaurinka utsantramaitsuapi tusar nekainaji. <sup>5-6</sup>Tuma asamtai Cristo ju nugkanam nina apari Yuusan chicharuk:

“Shuar aina tagku ainan maa nuna epenak: Tunaaur tsagkurturta tusar turamainakaisha, ameka nuka shir anentatsme. Tura asam shuaran tunauriin mantamnati, tusam wina iyashur shuara iyashijai metek amajtusume.

<sup>7</sup>Nu turuta asaakmin,

Yuusru, wina pachitas papiinum aararua nunisnak, ame wakeramurmin umiktasan, tawaitjai tusan timiajme” tusa tinaiti.

<sup>8</sup>Cristo chichamea nu shir nekarwarmi. Yama nagkamchakka chicham umiktinan Moisés aak: Ju umiktarma timau aigkisha, Cristo nina Aparin chicharuk: “Shuar aina tagku ainan maa nuna epenak tunaaur tsagkurturta tusar turamainakaisha, shir anentatsme” tusa tinaiti. <sup>9</sup>Nuna tina chikichnasha chichaak: “Yuusru, ame tame nuna umiktasan nugkagka taawaitjai”. Chicham umiktinan Moisés aak: Shuar aina tunaauri tsagkurnartasa tagkun mainiarti tusa tina nuka yapajiakum yamaika yamaram mantamnatin shuar aina susaume

taku tinaiti. <sup>10</sup>Jesucristoka ina pegkermantikramattsa Yuus wakaramun umiak, atakka mantamnashtinan chikichkia mantamnawaiti.

<sup>11</sup>Ashi sacerdote ainaka kashi kashinig shuar itainamun Yuusan suinak, tagkun maa jakaru aina nuka ishichkisha tunaunka tsagkurnamainchau aig epejkaruiti. <sup>12</sup>Turasha Jesucristoka atak awena mantamnashtinan chikichkia mantamnawaiti. Tuma ataksha nayaimpinam waka, nina Apari untsurini ekeemsauwaiti. <sup>13</sup>Tuma asa yamaika “nina shuari ainan ashi nepetkati” tusa nina apari nakawai. <sup>14</sup>Nigka chikichkia mantamnamuik, shuar ainan Yuus pegkermakartin arti timaunka tuke atinan pegkermantikayi. <sup>15</sup>Wakan Pegkera nusha nekasa nunak shir nekantikramuk: <sup>16</sup>“Wii Israel shuar ainan chicham yamarman taja nuka juwaiti: Wii atumin chicham umiktarma tinaitjarum nuna shir nekantikatnaitjarne, tura wina chichamrunka ishichkisha kajinmatkishtinan atumi enentain shir anemiktinaitjarne. <sup>17</sup>Tura shuara tunauro ainanka tsagkuuran atakea nuisha ishichkisha enentaimtuschatnun kajinmatkin inaisatnaitjai”, tawai tusa tinaiti. <sup>18</sup>Tura Cristo ina tunauroin mantamna tsagkurtamrau asamtai, ina tunauroin Yuus tsagkurturti tusar tagku maatka atsumatsji.

<sup>19</sup>Wina yatsur, umaar ainata, Jesucristo mantamna asamtai, yaunchuk sacerdote aina Yuus ememattasa iruuntai jea tesamu shir Pegker tutainam wajjakarua tumasrik yamaika Yuus pujamunmagka ashamsuk waimainaitji.

<sup>20</sup>Yaunchukka shuar ainaka Yuusa

jee tesamu shir Pegker tutai ajakua nuigka waya jakcharuiti. Turasha yamaika Cristo inii mantamna asamtai, Yuus nayaimpinam puja nuigka waimain ainaji. <sup>21</sup>Ashi ii Yuusnau ainaj nutin sacerdoteri senchirtina nuka nigkiti. <sup>22</sup>Tuma asamtai Yuusa nuka shir anentsa araantutsuk jearmain ainaji. Tura Criston nekasapita tuina asar, wina tunauroimpapi wika waittan jukitnaitja tusarka nuka enentaimtumaitsuji. Ina iyashi entsajai nijarar pegker amajtaiya numamtuk, Cristo ina tunauroinka tsagkurtamar pegker amajtamsauwaitji. <sup>23</sup>Yuus ni anajmatramamurinka tuke umin asamtai, isha nigki enentaimtumainaitji. Nui Cristo enentaimtuta nuka inaitsuk, ni nemarkur tuke kakanmamiarmi. <sup>24</sup>Ii ainatika chikich ainajaisha yainaikarmi, tumakur Yuuscha nu senchi aneakur pegkera nuke takasarmi.

<sup>25</sup>Ujumak shuar Cristo nemarkur inaisarai, nuka tumatsuk, Cristo winitnuriya nuka wari jeatin asamtai, ichichnairartasa ashi irunmaunmagka tuke iruuntsarke amainaitji.

#### **Yuus waittan sukartamuka shir ashammainaiti timau**

<sup>26</sup>Shuar Cristowaiti nekas uwemtikartinka tusa tamaun shir nekauwaitiat, tunaun wakerus taká pujauka Cristo atakka mantamnachu asamtai nina tunauroigka tsagkuram achatnaiti. <sup>27</sup>Tuma asa nu shuarka Yuus waitat suam, ashi Yuusa shuari aina nujai ji senchi keamunam egkemas waittsatin asa, senchi sapijmmainaiti. <sup>28</sup>Yaunchuk chikichik shuarkesha Moisés

chicham umiktarma timaun umiachun, jimar shuarkesha, tumachkusha treskesha atukar, apu ainan jeariar: Nu shuar chicham umiktinan Moisés aarua nuna umitsuk pujawai tuinakaigka, wait anentsuk maa jakaru ainawai. <sup>29</sup>Turasha Yuusa uchiriya nuna pachisar, ni mantamnamunmagka uwemnatsui tusar nakitainak, Wakan Pegker ina wait anentrama nunasha pegkerchaun chicharainaka, chicham umiktarma Moisés timaun umiachun waittan sujaku aina nuna nagkas Yuus waittan susatnaiti. Cristo mantamnak numpen ukaruiti. Numamtuk yamar chicham umiakur Cristo nekasapita takur tsagkurnaru ainaji. <sup>30</sup>Yuus chichaak: “Wiyaitjai waittan sukartinnaka, tumau asan shuar tunau ainanka waittanam yapajkannaitjai”, tusa tina nuka nekaji. Chikishcha tu aarmauwaiti: “Yuus ninu ainanka pegkernash takasaruit tusa iistinaiti”. <sup>31</sup>Yuus tuke pujuwa nu waittan sukartamuka shir ashammainaiti!

### Cristo enentaimtuta nuka inaisairpa timau

<sup>32</sup>Atum yama nagkamchakrum Cristo nekasapita tinu ainarum nuisha urukawaitrumea nu aneartarma. Atumka senchi waittsauwaitrume, imaniakrumsha umamkesrum shir katsuntrarum nemarkawaitrume. <sup>33</sup>Atum Cristo nemarin asaakrumin, shuar tuakmaunam paan iwainakar pegkerchau chichartamainak, atumjai yujainancha suimawaru ainawai. Turamun wainkar wait anenmain iisarusha ainawai. <sup>34</sup>Chikich shuar aina Cristo nemaraina asar, achikam cárcelnum

chumpirusha atumka wait anentrauwaitrume. Tura atumi waririn yarurtamkarmataisha kajertsuk, juiya warí ainan nagkasau winaka nayaimpinam tuke atina nu arutui, tusarum shir aneasrum inaisauwaitrume. <sup>35</sup>Tuma asarum Cristo enentaimtuta nuka inaisairpa. Tura nigka pujut nagkanchaun suramsatin asantai, Cristo tupantrairpa. <sup>36</sup>Atumka Yuus anajmakartuamua nu jukittsarum, umamkesrum pujusarum, ni wakeramua nuke umirkattsarum, waitakrumsha katsunmain ainarme. <sup>37</sup>Yuusa chichame tu aarmauwaiti: “Winitna nuka megkaatsuk winittawai. <sup>38</sup>Ni wina shir enentaimturunka wii pegkeraitme tusan titinaitjai. Turasha wina inaitusu ainanka shir anentsashtinaitjai”, tusa tawai. <sup>39</sup>Turasha ika shuar Cristo nemartan inaiyaina asar, megkarau aina tumauka ainatsji. Antsu ika niinig enentaimaina asar uwemratin ainaji.

### Israel shuaran uuntri aina Yuusan nekasapita tiarmau

**11** <sup>1</sup>Nekasapita tamauwa nuka Yuus nekas imatiksagkeapi umiktatua tusa enentaimtamua nuwaiti. Pegker ainan pachis chichainakaisha wainkachu ayatkur nekas nuninapita tusa enentaimtuta nuwaiti. <sup>2</sup>Ii Israel ainatin uuntri ajakarua nu, Yuusnaka enentaimtu jakaru ainawai. Turamu asa Yuuscha nitanka shir anentu jakuiti.

<sup>3</sup>Yuus nekasapita tuina asar, nugka aina aunka, wainmainchau aina nujai yaunchukka atsu jakunapi Yuus nina chichamenig najanawaita tusar nekaji.

<sup>4</sup>Tura Abel Yuusan nekasapita tinu asa, Yuus wakeramun turusag





(He 11.9)

takak tagkun maa epeak Yuusan emematnaiti. Turamu asa nina tunauringka Yuus tsagkurauwaiti. Antsu Caínka Yuus wakeramunka takaschauwaiti. Tuma asamtai nina tunauringka Yuus tsagkurachuiti. Turamu asa kajek nina yachin maa-waiti. Abel Yuusan nekaspapita tu jakua nuka isha nunisrik Yuusain nekaspapita tuuta nuna jintinramji.

<sup>5</sup>Tura Enocsha Yuusan nekaspapita tinu asamtai, iwákunak nayaimpinam Yuus jukinaiti. Turamu asamtai, shuar ainaka wainkacharu ainawai. Yuusan chichame tu aarmauwaiti: Enoc nayaimpinam juachmau pujus, Yuusan shir enentaimtikrauwaiti. <sup>6</sup>Yuus nekaspapita tachakrika shir enentaimtikmaitsuji. Shuar aina Yuusan shir enentaimtiksa wakeruinakka, Yuus pujau asampapi pegkernum yainkattawa tusar tumain ainawai.

<sup>7</sup>Tura Yuus Noén chicharuk: Shir ashammain atalui tusa ujakam, nigka wainchayat, nekaspapita tusa Yuus timaun umiak, nina nuwe, nina uchiri ainan tura uchiri nuwe ainajaimak uwemratnun arcan najanawaiti. Antsu shuar Yuusa chichamen umirkachu ainaka jinaawaru ainawai. Turasha Noéka Yuus timaun nekaspapita tinu asamtai, shir anentas uwemtikrauwaiti.

<sup>8</sup>Tura Abrahamsha Yuusan nekaspapita tu jakuuiti. Yuus chikich nugkanam wetá tima, Abrahamsha Yuusan umiruk nina tiragke aina matsamsatnun Yuus inaktustajme timaunam wuwaiti. Tura nina patai ainanka ashi ikuak, jeatnuringka ishichkisha nekachiat, jiinki wuwaiti. <sup>9</sup>Yuusan nekaspapita tau asa, Abrahamka chikich nugkanam, Yuus ju nina nugke atii timaunam jeaa atakea nuisha ashi nina tiragke nu weantu ainasha matsamsatnunami pujusuiti. Nu nugkanmagka nitaka irar kaunak matsamna numamtuk, nuap jeanam matsama jakaruuiti. Nina uchiri Isaac, tiragke Jacob weantu ainasha tumasag matsama jakaruuiti. <sup>10</sup>Tura Abrahamka nayaimpinam yaakat pegkernum Yuus shir jeamkamunam pujustaj tau asa, ju nugka juigka chikichik jeamkak shir emetnasa pujamurigka atsurujakuuiti.

<sup>11</sup>Sarasha Yuusan nekaspapita tinu asa, uuntach asa uchirmamainchauwaitiat, Yuus anajmatruama nunaka imatiksagkeapi umiktatua tau asa uchirmakuuiti. <sup>12</sup>Abrahamka jamain jas pujayat nina nuwe uchirmakuuiti, nuu weantu ainan ya nekapmamainchauwa iman, tura yaikim nekapmamainchauwa iman amajsauwaiti.

<sup>13</sup>Ashi ina uuntri ainaka Yuus anajmatamua nunaka pegkesha jutsuk jinaawaru ainawai. Turasha nitaka Yuusan nekasapita tinu asar, ii jakaakrincha, Yuus timauka uminkatnapita tusar shir ane jakaru ainawai. Nitaka ika irara numamtin asar, ju nugka juigka tuke matsamsash-tinaitji tu jakaru ainawai. <sup>14</sup>Nitaka shir nugke atak atina nunak enentaimtuina asar, tu chichaa jakarua nuna nekamtikramji. <sup>15</sup>Nitaka nugka ikukmaurinka waketmain ainayat, nuna pachisarka chichaa jakcharu ainawai. <sup>16</sup>Antsu nitaka nugka pegkeran nayaimpinmayan wakeruina asar tumawaru ainawai. Tuma asar-matai Yuus yaakat nayaimpinam a nuna umirkauwaiti. Tura asa Yuuska shuar ainan pachis: Juka winau ainawai tutanmagka natsamatsui.

<sup>17-18</sup>Abraham nekasapita tamau asa Yuus chicharuk: Chikichik uchi arutramtatui tusa tinaitak, ni nekasapita taurin nekapas iiyak uchiram chikichkia nu maam epeakum emematrixa tusa tamsasha turattsa wakekauwaiti. “Isaac weantunam amee weantu ainaka pampagtinaiti”, tusa timaitiat uchirin maattsa umintsauwaiti. <sup>19</sup>Abrahamka Yuuska shuar jakauncha nina senchirijaimpa inanmainaita tau asa, Isaac jakamtaisha, nigkiapi inanmainaita tusa uchirin kuchijai iju maattsa iyan Yuus chicharuk: Uchirmeka maawaipa tusa tinaiti. Nuna tura asantai maamun Yuus inankimua numamtinaiti.

<sup>20</sup>Tura Isaacsha Yuusan nekasapita tinu asa, nina uchiri Jacobon, Esaújai nita atak pujustinan pachis, Yuus pegkernum yainmaktatrumetusa ujakuuti.

<sup>21</sup>Jacob jakattak tepes, José uchiri jimaran chiki chikichik Yuus pegkernum yainmaktatrumetusa tinaiti. Jacob jakattak tepayat nantaki ushukrutairijai ushukrus ichichmamas wajas, Yuusan emematnaiti.

<sup>22</sup>Tura Josésha tumasag jakattak tepes, ni weantu ainan chicharuk: “Atum Egipto nugkanam matsatrum juka ina nukgeen shimakrum jijntratnaitrume. Tumakrumka wait aneasrum wina ukunchrusha jurutkitin ataarma”, tusa tinaiti.

<sup>23</sup>Moisésa apari tura nukurisha Yuusan nekasapita tuina asar, Moisés uchi pegker akinamtai, apu chichaak uchi maatarma tusa inamramuncha ashamsuk, tres nantu uukaru ainawai.

<sup>24</sup>Tura Moisés tsakarsha, Yuusan nekasapita tinu asa, Egiptonmaya apu nawantrin uchiriyaitjai tumamtanka nakitrauwaiti. <sup>25</sup>Tura nigka Egiptonmaya aina ujumak uwí pujusar tunaun takainajai iruuntra nakurutan nakita asa, Israel shuar Yuusnau aina nu waitkainamujai iruuntra waittan, wakekauwaiti. <sup>26</sup>Nigka Egiptonmaya warí ainanka wakeru jakchauwaiti. Antsu Cristo atak taa waittsatna tumasnak waittsatjai, tusa senchi wakekauwaiti.

<sup>27</sup>Tura Yuusan nekasapita tinu asa, Egiptonmaya apu kajektinrincha ashamsuk jinkinaiti. Turasha nigka Yuus wainmainchauwa nu nijai wekamunka nekau asa, Yuusan nekasapita tutanka inaisachuiti. <sup>28</sup>Moisés Yuusan nekasapita tinu asa, Israel shuar ainan chicharuk: “Oveja maarum, atumi jee waitiri numpajai yakartarma, tura asakrumin nayaimpinmaya shuar uchi

iwairin maatsuk nu jeanmayanka ayatik ikuktatui”, tusa tinaiti.

<sup>29</sup>Israel shuar ainasha Yuusan nekasapita tinu asar, nayants Kapantu tutaincha Yuus ukuyuantai, kukarnum katitia numamtuk katigkaru ainawai. Antsu Egiptonmaya shuar ainaka katigkartajkama jakekaru ainawai.

<sup>30</sup>Israel shuar ainasha Yuusan nekasapita tuina asar, yaakat Jericón siete tsawan tentegkarmatai, yaakat kayajai tanishmarmaun Yuus akaketkauwaiti. <sup>31</sup>Nuwa Rahab, akika takataisha, Yuusan nekasapita tinu asa, shuar nekamattsa yujanchara juki kuitamkau asa, chikich shuar chichaman umichu aina jinaawarua nujai iruunar jakachuiti.

<sup>32</sup>¿Yana pachisnak nuiyasha titaja? Gedeónkan, Barackan, Sansónkan, Jeftén, Davidtan, Samuelan, tura Yuusa nekasapita tu jakaru aina nunasha tumainaitjai, tura sha nu imatrúa tumainka tsawan atsuratawai. <sup>33</sup>Chikich shuar ainasha Yuusan nekasapita tuina asar, chikich nugkanmaya ainan nepetkaru ainawai, chikich apu naamkarsha shir inama jakaru ainawai. Tumaina asarmatai shuar ainanka Yuuscha ni anajmatawa tumasag yaimkauwaiti. Tura asa uun yawa yuawarti tusa uun yawa matsatmaunam egkeawarmataisha, uun yawa ainan yukartumainchau amajsauwaiti. <sup>34</sup>Esati tusa ji keamunam egkeawarmataisha, esawai tusa kuitama jakuuti. Kuchijai maawartaj tuinakaisa uwemtiku jakuuti. Kakakchau ainancha kakaram amajsauwaiti, turamu asa nita shuari ainancha nepetujakaruuti. <sup>35</sup>Nuwa aina patai jakamtai, wake mesemar

pujakaisha, Yuus inantuki sujakmau ainasha ujumak ajakaruuti. Turasha chikich ainasha Yuusan nekasapita tuina asar, senchi waitkasa maam ajakaru ainawai. Nitaka: Yuusapi wii jakamtaisha inantuki pegker pujutnum apujtustinaita tusar tiaru ainawai.

<sup>36</sup>Nuiyasha chikich aina pegkerchau chicharkur wishikramu, asutiamu, cadenajai jigkarmau tura achika egkeamu ajakaruuti. <sup>37</sup>Tura kayajai tuka tukakua maamu aina, serruchujai jimapetuk tsupika maamu aina, kuchijai maamu aina, jeenchau yujasar, ovejan nuapen cabra nuapejai nugkuinak, kuitrinchau asar, shir enentaimsa pujuinachuk waitkainam ajakaru ainawai.

<sup>38</sup>Nitaka Yuusan nekasapita tichau ainajai iruunar pujuinaksha shir pegker ajakaruuti. Turasha shuar pegkerchau aina nujaiangka Yuusnau aina nu ima yacha ajakaruuti. Iman ainakaisha shuar Yuusan nekasapita tichau ajakaru nu waitkainam, muranam wear kaya wanam kanú jakaruuti.

<sup>39</sup>Yuuska nu shuar aina ninii nekasapita tuina asamtai, shir enentaimtu jakuuti. Turasha nitan anajmatawa nunaka eke jatsukka jukicharu ainawai. <sup>40</sup>Yuus nitan pegkeran anajmatawa nunaka ii ainajai iruuntrar metek jukiarti tau asa, susachuiti.

**Jesús waittsauwa  
nu enentaimtusa  
nemarkarmi timau**

**12** <sup>1</sup>Nukap shuar Yuusan nekasapita tu jaku aina nuka, Yuusan nekasapita tamaurin iwainmamkau ainawai. Nu nuniktaj

takurka tunau takat, ina pegkerchau amajtamaina nuka inaimainaiti.

<sup>2</sup>Yuusain nekasapita tutanam Jesús yainmaku asamtai nigki enentaimtusmi. Tura Yuusain tuke nekasapita tiarti tusa nigki yainmaji. Nigka numinam achiram waittsauwaiti. Tura nigka juna imanikan waittsancha shirapi aneastinaitja tau asa, natsanmain amajka maamsha, natsaamsuk mantamnawaiti. Tuma asa yamaika Yuusa untsurini eketui. <sup>3</sup>Jesúsán ina tunaaurin shuar aina senchi waitkasaru aina nu enentaimtustarma. Tumakrum pimpiakrum nemarkachminu enentaimtsuk nemarkatarma.

<sup>4</sup>Atumka ashi shuar aina tunau takatan inaiyainak Yuusan umirkarti, tumainak Yuusa chichamen etserkarti tusarum wakerarme. Nu tumakrumsha shuar aina atumin mantamatta waitkarmamain aina nuigka eke jeatsrume. <sup>5</sup>Yuus shuar ainan niini nekasapita tuinan nina uchiriyá numamtin asarmatai, jintinta nu aneartarma. Chicham aarmaunam chikichik shuaran pachis chichaak: “Wina uchiru, wii jintinjam nu antraya numamtuk enentaimtutsuk shir anturtukta. Ame pegkerchau takakmin nuna pachisan takaisha wake mesemar enentaimipa.

<sup>6</sup>Wina uchir arti tusa etegkramurun, tura wii aneamu ainanka, pegker takatan unuimartarti tusan ujumak tsawan waittan suajai”, tusa tinaiti.<sup>a</sup>

<sup>7</sup>Tuma asamtai Yuus atumin waittan surammauka katsuntratarma, Yuuscha shuar uchirtin nina uchirin

unuimarti tusa chicharna numamtuk amajtamrume. <sup>8</sup>Yuus ashi nina uchiri ainatin unuimarti tusa waittan suramji. Tuma asamtai atumin waittan suramchakaigka, nina uchiri ainatsrume, antsu chikicha uchiri ainarme. <sup>9</sup>Ii uchiich arinka pegkerchau takasaipa tusa ina apari jintintrama jaku ainawai. Turutmaina asarmatai nitaka eme anentsa iya asar miru jakaru ainaji. Tura nu nagkamasa pujut pegkera nu unuimartasa, ina Apari nayaimpinam pujuwa nu umirmainaitji. <sup>10</sup>Ujumchik tsawanchik nita pegker iyaamunam ina apari aina waittan surama jakaru ainawai. Turasha Yuus pegkeran jukiarti tusa ina waittan suramji. Tuma asa ni pegkera imauk amajtamsattsá wakerutmaji. <sup>11</sup>Waitamua nuka najaimamu asa shir amajkartichuiti. Nuka nekasaiti. Turasha waitamunam shir aneasa pujuta nu unuimanui.

**Yuus pegkeran suramsattsá wakera nuka nakitraitirpa timau**

<sup>12</sup>Tuma asamtai atum ainatirmeka jinta pegkera nu nemartanam pimpikrum, atumin pujutincha kakachau nekapearum nu ichichmamaratarma. <sup>13</sup>Yuus wakeramua nuke takákrum, shuar Yuus wakeramu takatan nekainachu asar, tunaun taká matsataina nuna inaisarti tuserum yagtarma.

<sup>14</sup>Ashi chikich ainajaisha agkan shir enentaimsa pujustarum wake-tarma. Tura nekas pegkernum pujustarma. Shuar pegker pujuinachuka apu Cristonka wainkashtin ainawai. <sup>15</sup>Chikichik shuarkesha

<sup>a</sup> 12.6 Pr 3.11; Ap 3.19

Yuus nemartan inaiyainak uwem-mainan megkaakai tusarum chikich ainajaisha wait anennaisarum yainaiktasrum waketarma. Yuusjai kajernaikairum, senchi kuitam-mamatarma. Shuar Yuusan kajera nuka árak jatayi numamtuk nukap shuaran pegkerchau amajmainaiti. <sup>16</sup>Atum ainarum nuiyatirmeksha chikich nuwajaigka takanaisairpa. Tura nuwa ainasha nina aishri-jainchuka takanaimaitsui. Esaú ni iwairi asa aparti jakamtai, warí ainan jumainan senchi tsukar ta asa yutain yuak ni jumainnaka yachin ashi inaitusuiti. <sup>17</sup>Esaú ni jumain-trin surukuitak aparin jeari, pegkeran chichartukat tukama nakitram senchi útkusha ni pegker chicharam amaintrigka atsursauwaiti.

#### Yuuska jiya numamtinaiti timau

<sup>18-22</sup>Yaunchuk ina uuntri aina nain Sinaí tutainam ji keamunam jeawaruiti. Tumawarmatai yuragkim mukusa jasuiti tuma senchi petuk tura senchi charpiru. Imaniamunam Yuusa kachuri shinamun antukaruiti, tumamunam nui Yuus chichajakuiti. Tura nuna antukaruka senchi ashankar, awenagka chichakchati tusar tiaruiti. Tura Yuus chicham umiktinan chichaak: “Wii yamai jui pujaig shuar aina tura tagku ainaksha Sinaí mura-riin wakacharti. Nui waaka kayajai turachkurmeha nagkijai maatarma”, tusa tinaiti. Tinu asamtai nitaka katsunmainchau sapijmakaru ainawai. Ashi shuar nuna wainainaka shir ashammainan wainkaru ainawai. Tumaina asamtai Moisés-kesha chichaak: “Wisha ashamakun kurajai”, tusa tinaiti.

Sinaínum tiju iruuntsarua nuka atumka wainkachuitrume. Turasha chikich nain Sión tutainam jeantuitrume. Yuus tuke pujuwa nuna yaaktari yamaram Jerusalén tutai nayaimpinam a nuwaiti. Ai nayaimpinmaya shuar aina Yuusan emematainak nukap iruuntrar matsatainawai. <sup>23</sup>Tura yama nagkamchak Yuusa uchiri ajakaru iruna nuka papi nayaimpinam a nui nita naarigka aatkamu ainawai. Yuus shuar aina takasmaurin ashi iirna nusha nuig pujawai. Tura shuar pegker jina aina nuna wakanisha Yuus pegker-mamtikamu asar nuig matsatainawai. <sup>24</sup>Tura Jesúscha nuig pujawai. Yuusjaisha ina shir igkumtikramak, Ni yamaram chichama nuna umikuiti. Abel jak numpen puarua nui, Caíncan Yuus waittan susauwaiti. Antsu Jesús ina tunaurin mantamnak nina numpen puarua nujai Yuus ina tunaurin tsagkurtamuk waitat jumainnumsha agkanmamtikramawaitji.

<sup>25</sup>Tuma asamtai Yuus ina aujtama nusha nakitirairum shir kuitam-mamatarma. Israel shuar ainaka ju nugka jui chicham umiktinan Moisés ujamsha nakitraru asar, waittanacha uwemturcharuiti. Yuus nayaimpinam pujuwa nu chicham umiktarma turammauwa nu umiachkurka, nu nagkamasa waittaka pegke uwemtumaitsuji. <sup>26</sup>Yaunchuk, shuar ainancha aujeak Yuus nugkan peakuiti. Turasha yamai ina chichartamuk: “Inagnamunam yamai chikichkia nugkan peaktajai, turasha ima nugkanak turashtatjai, nayaimpinmaya ainancha ashi turattajai” turamji. <sup>27</sup>Ju antakur ashi najankamu aina tuke

achatna nuka mesektinapita tusar nekaji. Turasha tuke atina nu juaktin ainawai. <sup>28</sup>Yuus nina inamtairin ina suramsattaj nuka ishichkisha urukashtinaiti, nuka tuke atinaiti. Tuma asamtai Yuus maaketi tiarmi. Tumainakur Yuus aneakur, nigka nuna tu wakera asamtai, shir aneasa emematiarmi. <sup>29</sup>Tura ina Yuusriya nuka pegkerchau ainan ashi emegkartin asa jiya numamtinaiti.

**Cristo wakeramua nuke takastarma timau**

**13** <sup>1</sup>Chikich ainajaisha yatsutjai anenaimaina imanisa anenaita nuka inaisairpa. <sup>2</sup>Tumakrum atumka irar aina atumi jeen winakaisha shir anentsarum juta nuka kajinmatkirpa. Yaunchuk nuna tumaina asar, nayaimpinmaya shuaran nekainachiat shir anentas jukiarusha ainawai.

<sup>3</sup>Atumin achirmakarmatai pujumainaitrum iman enentaimsarum shuar achirmau aina nusha, kajinmattsuk yaigtarma. Shuar tunaun takaschauwaitiat waitat suaku waitkainam, waitaina nu uruk yaimainaitrumea nusha enentaimtustarma. Wisha aitka waitkamapi amainaitja tu enentaimtumastarma.

<sup>4</sup>Atum nuwenamua nuka pegker enentaimtitarma. Nu tumakrum pegkerchausha takarnaitsuk pujustarma. Shuar nina nuwenchujai, tura nuwa nina aishrichujai takanain ainanka, Yuus waittan susatnaiti.

<sup>5</sup>Tura kuitcha nukap arutti tusar-meka enentaimtu pujuirpa, nuka tumatsuk ishichik arutramaina nujaig shir anearum pujustarma. Yuus chichartamuk: “Atumnakka

pegke inaisashtinaitjarme”, tusa tinaiti. <sup>6</sup>Tuma asamtai ika shir aneasa: “Apu Yuus winaka yaintu asamtai, shuar aina kajertuinakaisha ashamakshattajai”, tusa tumainaitji.

<sup>7</sup>Yuusa chichamen atumin ujatma jakaru aina nu uruk pujusarua ainawa nu enentaimtusrum iistarma. Tumakrum nita Yuusan nekasapita tuina asar, Jesúsan umiru jakarua tumasrumek umirkatarma.

<sup>8</sup>Jesucristowa nuka yapajinchauwaiti. Yama nagkamchaku ajakmaurigka yamaiya juisha, atakea nuisha tuke tumauk atinaiti. <sup>9</sup>Tura shuar atumin tarutramawar: Wii jintintawaitjarum nuna yapajia jintinramaina antakrumka nekasapita tiirpa. Chicham nekasa nu umitka kajinmatkirum inaisairpa. Tura yutai ainan juka yumaitsui, ju yumainaiti, tusar tu jintinramaina nuka ishichkisha yainmatsrume. Antsu Yuus ina wait anentrama asa, ina enentaimtairincha senchimitikrama, nuwaiti ima pegkerka.

<sup>10</sup>Cristoka ina uwentikramratts mantamnawaiti. Turasha sacerdote yaunchuk jakarua nuka ii Cristo nekasapita tuinati nekainaj imatiksagka nekajakcharu ainawai.

<sup>11</sup>Nitaka tagkun maawar, nuna numpen jukiar, Yuus ememattasa iruuntai jea tesamu shir Pegker tutainam Yuusan susar shuar tunauri aina tsagkuurata tujakaru ainawai. Turasha tagku namagkenka yaaktan ikukiar shuar atsamunam aesu jakaru ainawai. <sup>12</sup>Tura Jesúscha shuar ainan wini nekasapita tuinakai nita tunaurin tsagkuran winau amajstajai, tusa Jerusalénkan ikuki mantamnak numpen puaruiti.

<sup>13</sup>Tuma asamtai ii ainatisha tunau takata nuka ikuinakur Jesús nemarkarmi. Tumakur Jesús naki-tram waittsauwa tumasrik wait-tsarmi. <sup>14</sup>Ju nugka juigka yaakat ii tuke pujustinka atsurtamji. Tuma asamtai nayaimpinam Yuus pujamunam yaakat umikmauwa nui pujustasar nakainaji. <sup>15</sup>Tura Jesucristo ina uwemtikramrau asamtai, Yuusa nuka tuke emematmainaitji. Yuus emematkurka, warí aantrar sumaina numamtuk amajeaji. <sup>16</sup>Tura atumin arutramaina nu chikich shuar suakrum pegker enentaimtikta nuka kajinmatkirpa. Ii pegker takamua nusha Yuus warí aantrar suamua numamtuketi. Turakrika Yuuscha shir enentaimtikji.

<sup>17</sup>Cristo neparin ainatirmin apurisha umirkatarma. Yuusain nekas-papita tutan inaisarai tusa nitaka ayamsuk atumin senchi yainmaina asarmatai, araantusrum iistarma. Nita takasmauri pegker, tura pegkerchau akaisha Yuus atakea nui titinaiti. Atum umirmaka, nitasha shir aneasar nakunkut takasartatui. Turasha atum umirchamka, wake mesemar pujusartatui. Tumaina asar shir yainmakchartatui.

<sup>18</sup>Tura ii ainatin pachikrattsarmesha Yuus aujsatarma. Yuus wakerramu takainaj nuka ika nekainaji. Tumaina asar ika pegker enentaimsar pujuinaji. <sup>19</sup>Wisha ataksha waketkin wári atumin taachainjash,

wina pachittsarum Yuus senchi aujtursatarma. <sup>20</sup>Jesucristoka inii mantamnak numpen puaruiti. Tumamtai Yuus inankinaiti. Yamaika yamaram chicham tuke atina nuna Yuus ina umirtamkauwaitji. Ina apurigka niyaiti, tuma asa shuar ovejarin kuitamna numamtuk, ina shir kuitamramin asamtai ii eme anentsa iitaigka niyaiti. <sup>21</sup>Tuma asa nigki pegker amajtamsau asamtai, atumsha ni wakeramua nuke takamain ainarme. Jesucristo yainmasmatai, ii ainatincha ni wakera nuna takamtikramsati. ¡Ii ainatisha Cristo tuke emematiami! Maake.

#### Inagnaku akatmamau

<sup>22</sup>Yatsur, umaar ainata, wait anearum wii atumin ichichmamtikrattsan chichaman ishichik aaran akuptajrum nusha umamkesrum aujkurum nekatarma tusan tajarme. <sup>23</sup>Tura junasha uajjume: Yatsur Timoteoka cárcelnumia jiinki yamaika agkan jasai. Ni wári taakaigka atumin waitmakti tusan ayaktatjai.

<sup>24</sup>Jesúsán neparin ainan apuri ainan, ashi yatsur, umaar ainancha chichaman akuptuinajai. Yatsur jui Italianam matsatainasha aitkasag pachitmainak chichaman akupturmainawai.

<sup>25</sup>Yuus ashi atumnasha wait anentramak shir yainmakti. Maake, nunis atii.